

**BOSNA I HERCEGOVINE
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA DOBOJ JUG
OPĆINSKO VIJEĆE**

Broj: 01-04-333-16/20

Dana: 16.04.2020.godine

Na osnovu člana 23. Statuta Općine Doboj Jug („Službeni glasnik općine Doboj Jug“, broj: 03/08), Općinsko vijeće općine Doboj Jug na svojoj tridesetoj sjednici VII saziva održanoj dana 15.04.2020.godine d o n o s i

ODLUKU

o utvrđivanju mjera sa ciljem prevazilaženje posljedica izazvanih koronavirusom COVID-19

UVODNE ODREDBE

Član 1.

Ovom Odlukom utvrđuju se mjere za prevazilaženje posljedica izazvanih koronavirusom COVID-19 na području Općine Doboj Jug.

MJERE ZA PREVAZILAŽENJE POSLJEDICA

Član 2.

Mjere za prevazilaženje posljedica izazvanih koronavirusom COVID-19 su sljedeće:

- a) umanjuju se naknade svim općinskim vijećnicima, članovima komisija, članovima Savjeta MZ-a, članovima Upravnih i nadzornih odbora u iznosu od 30% za mjesece april, maj i juni 2020.godine;
- b) obavezuje se Služba za budžet, finansije i privredu da pripremi rebalans i uvede nove stavke u budžet s ciljem pomoći građanima i privredi, i to:
 - Jednokratna pomoć građanima - koji su ostali bez posla uzrokovano koronavirusom u iznosu od 20.000,00 KM,
 - Pomoć građanima slabijeg imovinskog stanja kroz nabavku robnih paketa u iznosu od 3.500,00 KM;
 - Fond za pomoć privredi u iznosu od 50.000,00 KM;
- c) oslobađaju se takse na istaknutu firmu za 2020.godinu, propisane Odlukom o komunalnim taksama općine Doboj Jug broj: 01-05-1-156-1/18 od 07.02.2018.godine, pravni subjekti registrovani na području Općine Doboj Jug kojima je rad obustavljen u potpunosti, za sljedeće djelatnosti:
 - svi ugostiteljski objekti iz navedene Odluke o komunalnim taksama;
 - frizerski i kozmetički saloni;
 - privatne predškolske ustanove;
 - privatne stomatološke ordinacije;
 - trgovine na malo – tezge na pijaci, trgovine telekomunikacijskom opremom računarima i posebnim softverima, butici, trgovine polovnom robom.
- d) refundiranje troškova odvoza smeća pravnim subjektima iz predhodne tačke.

Pravni subjekti koji su po ovoj Odluci oslobođeni plaćanja takse na istaknutu firmu za 2020.godinu a već su uplatili akontacije takse ili u cjelosti, istim će iznos uplate biti uračunat prilikom plaćanja takse za 2021.godinu.

OSTVARIVANJE PRAVA

Član 3.

Pravo na Jednokratnu novčanu pomoć građanima koji su ostali bez posla, iz člana 2. ove Odluke, imaju svi oni koji su od 16.03.2020.godine ostali bez radnog odnosa kao posljedica proglašenja prirodne nesreće usljed pandemije koronavirusa, da su prijavljeni u evidenciji Biroa za zapošljavanje Doboj Jug i da nisu ostvarili pravo na novčanu naknadu za vrijeme nezaposlenosti.

Pravo na pomoć iz stava 1. ovog člana se ostvaruje podnošenjem pismenog zahtjeva Općini Doboj Jug uz dostavljanje dokaza o prestanku radnog odnosa, potvrde sa biroa kao dokaz da su prijavljeni i nisu ostvarili pravo na novčanu naknadu za vrijeme nezaposlenosti.

Član 4.

Pravo na Pomoć građanima slabijeg imovinskog stanja kroz nabavku robnih paketa, iz člana 2. ove Odluke, dodjeljuje se onima koji su kao takvi evidentirani u Službi za civilnu zaštitu, opću upravu i zajedničke poslove Općine Doboj Jug ili evidenciji Crvenog križa Doboj Jug, i ista će se ostvarivati putem Crvenog križa Doboj Jug.

Član 5.

Sredstva iz Fonda za pomoć privredi, iz člana 2. ove Odluke, predviđena su:

- a) za subvencioniranje dijela obaveza koje Općina Doboj Jug bude imala u skladu sa odlukama viših nivoa vlasti (kantona, Federacije);
- b) za subvencioniranje 50% minimalne plaće u Federaciji BiH za mjesec mart 2020.godine, pravnim subjektima iz člana 2. stav 1. tačke c) ove Odluke kojima je rad obustavljen u potpunosti, za uposlenike sa prebivalištem u općini Doboj Jug uz uslov da isti nisu otpušteni. Ovo pravo ostvarivat će se na osnovu raspisanog javnog poziva od strane Općine Doboj Jug.
- c) za refundiranje troškova odvoza smeća pravnim subjektima iz člana 2. stav 1. tačke c) ove Odluke kojima je rad obustavljen u potpunosti.

Član 6.

U slučaju dođe do smanjenja priliva budžetskih sredstava, sredstva predviđena članom 2. stav 1. tačka b) ove Odluke će se uskladiti sa raspoloživim sredstvima u budžetu.

PRELAZNE I ZAVRŠNE ODREDBE

Član 7.

Za realizaciju ove Odluke zadužuje se Općinski načelnik i nadležne službe Općine Doboj Jug.

Za realizaciju pojedinih mjera iz ove Odluke Općinski načelnik će imenovati Komisiju za provođenje određene mjere, uz jasno definisane zadatke.

Član 8.

Ova Odluka stupa na snagu narednog dana od dana donošenja i ista će biti objavljena u Službenom glasniku općine Doboj Jug.

Predsjedavajući Općinskog Vijeća

Mujo Avdić